

赴北美舉行巡唱 出錢慰勞團隊

黃淑蔓濕身嗌爽 伊健帶隊睇瀑布



■伊健出名豪爽，很照顧工作人員。



■黃淑蔓穿雨衣在瀑布前自拍。

鄭伊健早前飛到加拿大多倫多、美國大西洋城及雷諾舉行3場北美洲巡迴個唱，小師妹黃淑蔓 (Feanna) 隨他出發任表演嘉賓。伊健知道隨行的工作人員辛苦，自資租旅遊巴士及請當地導遊，帶大家欣賞尼亞加拉大瀑布。Feanna 笑言懶理濕身兼溶妝，最緊要玩得夠爽。

首次在多倫多開騷的鄭伊健特別準備了演唱會版紀念 Tee 做「手信」，於 Encore 環節唱《自動勝利 Let's Fight》時，與 Dancers 一起將紀念 Tee 拋到台下送給觀眾，將原本已經熾熱的氣氛推上頂點。Feanna 則準備了一首歌送給3站的觀眾，她說：「伊健哥哥想我唱一啲開心歌，我突然諗到經理人林珊珊嘅《戀愛預告》，雖然佢提點咗我好多唱呢首歌嘅技巧，但始終佢係原唱，加上佢有一齊嚟，所以我唱嘅時候好大壓力。好在現場觀眾嘅掌聲同歡呼聲鼓勵，畀咗好多信心我。」

完成首站多倫多，伊健為工作人員送上驚喜，出資安排大型旅遊巴士及請當地導遊，讓工作人員參觀尼亞加拉大瀑布，眾人冒着全身濕透登上遊船，近距離感受大瀑布的氣勢。Feanna 表示很爽：「可以上船近距離睇大瀑布，感受啲瀑布水飛埋身，雖然玩到妝都溶晒，但大家玩得好開心。」

只得兩分鐘時間轉機

之後大隊到大西洋城及雷諾進行巡唱，期間發生小插曲。Feanna 說：「我哋由大西洋城出發去雷諾，中間要搭兩程內陸機，原本中間有一個鐘轉機，但第一班機延遲咗，最後得番兩分鐘時間轉機，我哋要極速跑去另一個開口登機，雖然趕得切，但最擔心係啲行李跟唔切上飛機，大家都作最壞打算，以為連衫都有得換。點知去到雷諾，居然見到我哋啲行李，嗰種失而復得嘅心情真係好難形容。」



■黃淑蔓擔任伊健北美巡唱嘉賓。



■祖兒很喜歡發光耳環。lg 圖片

祖兒戴潮物創意無限

樂壇天后容祖兒緊貼潮流，經常買完潮物後放上社交平台跟大家分享。前日她上載戴「發光耳環」的照片，見她嘟嘴舉V，明顯很喜歡新玩意。她引用歌曲《暖光》的歌詞留言：「帶住佢，真係天黑不怕沒有光，從此自帶光芒。」創意無限的祖兒指發光耳環可以睇演唱會時當螢光棒用，行山亦不用帶電筒：「做人從此不再迷路。」她又稱喜歡買無聊嘢：「自得其樂不求人。」粉絲紛紛留言讚偶像有創意，更希望聽祖兒唱《暖光》。

李施嬅護膚全靠有「營」

李施嬅近日忙拍無綫劇《新聞女王2》，但反而愈忙愈靚，全因她注意飲食。她於社交平台分享護膚心得：「想擁有更多 collagen (膠原蛋白)，就要食多啲 retinol rich foods (視黃醇食物)，可以幫你身體製造 collagen，紅蘿蔔、雞蛋、菠菜、連皮番薯，我自己就會加紅菜頭同粟米，紅菜頭就有豐富鐵質，但係就會煮熟，唔係就會涼，粟米就有蛋白質。只要食得健康，皮膚就會告訴你，改善相當明顯。」她笑言獲化妝師讚皮膚好：「大家到時睇《新聞女王2》就知道。」



■李施嬅獲化妝師讚皮膚好。小紅書截圖

陳柏宇 黃妍 打造喜劇音樂會

由資深音樂人 Edward Chan (陳浩然) 率領普羅管弦樂團，集結陳柏宇、馮允謙、黃妍、何啟華 (Dee) 與梁業 (肥仔)，打造跨界音樂會《甚麼是喜劇》，將於7月19至20日在香港文化中心大劇院舉行，希望引得入場觀眾一笑。

提到喜劇，「周星馳」自然是關鍵字，柏宇說：「我哋都係睇周星馳大，最鍾意《賭俠》！依家諗番轉頭，唔係話因為邊句對白或邊個笑位特別好，而係因為呢啲喜劇代表一個年代。今次音樂會我會唱啲未唱過嘅歌。」

黃妍則最愛《家有囍事1992》的「無定向喪心病狂間歇性全身機能失調症」，她笑言：「嗰幕真係好好笑，哥哥 (張國榮) 好靚仔，啲對白又好好笑，起碼睇咗10次，每年新年都會睇。」



■黃妍最愛看《家有囍事1992》。



■陳柏宇是周星馳粉絲。